

# JA MYĪDU'UKPI NØKY MIDI JA PABLO TYANĠGAJX JA TIMOTEO

## *Ku ja Pablo ojts tnĵjayĵ ja Timoteo*

<sup>1</sup> Øts idø'øñ Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmø'øyindit. <sup>2</sup> Mets Timoteo ya'at nøky ndanĵa'ayip. Mjagyajpnipxi mets ja janchĵa'win, jade'en'ampyts myik'u'nktijy myik'u'nkjawĵ. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

## *Ku yikni'ane'emy jøts kyayikupøkt ja ka'øy'ixpøjkin midi ka' tyiyĵ yjanchĵ*

<sup>3</sup> Tan meets jam Efeso kajpjotp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaay' midi jam winaagindi jøts kidi ja tnanky'ixpikyidi ja winmaa'ñ midi ka' tyiyĵ yjanchĵ <sup>4</sup> jøts nayide'en kidi nugo tyikmøjtøkidi ja kwenti ja madya'aky midi nisudso'ampy katiidyøjkip. Nugo amyøñ tsaachyøñ tnimadya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudøjka'andi jøts adøm nbaduujnĵ ja Dios yja' midi adøm

ja tø xanipijkyim midi tø nyikmø'øyindi janchja'wingøjxp.

<sup>5</sup> Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwɣinmaa'ngyøjxp ku ja nadyamiyoxi ñaxy amuum janchja'wingøjxp. <sup>6</sup> Tøts yø winaagin tmajtstutnidi jøts nugo ñanktyuu'tigøyidi ku tpabøkti ja winmaa'ñ midi nisudso katiidyøjkip, nugo nadøki tnikyajpxy'atti. <sup>7</sup> Ja' chojktip jøts kyajpxwejp'i'attit sa ja Moisés kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tiy janch.

<sup>8</sup> Nnija'windip adøm jøts ku ja'abi kutujk y'øyi ku jade'en tyunkpaaty sam tø yiktanibiktaagi. <sup>9</sup> Jøts yiknijawit nayide'en jøts ku nima ja kutujk kyayiktanibiktaagi ja øyja'y midi katundigøødyip; pø ja'axi ja kutujk wya'añ ku ja tø kyøjy jøts ja tyu'unt ma ja jaa'y pøn tum nay'adsep tja'widip, pøn kamadoodip. Jaa ja tyuñ ma ja ka'øyjaa'dyi, ma ja møjpkøyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'ooktit tyiktigø'ødyit. Jats idø'n ja kutujk tyunkpaaty jøts ja tpayø'øy <sup>10</sup> pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojpk, <sup>11</sup> ja øy'ixpøjkin midi

tnigajpxp ja øgyajpxy ja ømyadya'aky, ja Dios yja' midi yiknitsokp, midi øts yam tø nyiktanipiky.

*Tyamøja'wip ja Pablo ja Dios ku ja pya'ayoyiyi*

<sup>12</sup> Ndukmøja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøkta'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt. <sup>13</sup> Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy. <sup>14</sup> Paty øts ja nwindson'ajtim møj ndukmøjawi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

<sup>15</sup> Tiy'ajtin yø' jøts niduki'iyi njanchja'wa'ant: ku ja nwindson'ajtim myiiñ ya naxwiiñ jøts ja tyiknitsok'ajty ja pøjkpitumbi jaa'y. Møj tundigøøbyi øts y'ijty, nika' pøn jade'en. <sup>16</sup> Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkpimee'kxy. Jade'en ø ndunjøpi sudso yikpaatt ja jujky'ajtin midi xemikøjxp ku ja yikpabiky yikjanchjawi. <sup>17</sup> Paty nayide'en nwindso'jka'ant, nmøja'wa'ant n'øyja'wa'ant ja Dios Teety midi nwindson'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi

dø'øn tu'ugyi ejtp, pøn tnija'widyaapy. Jade'en idø'øn ja y'ejxi tyiyi.

<sup>18</sup> Mets u'nk Timoteo, mets ya'at ndanipijkpy jøts yikxon xpadu'undit ja Dios yja' samdam mmimadyajkiidi ja Dios kyugajpxtyi. Mjanchjawip ja nwindson'ajtim amumjoojt jøts øy ja mwinmaa'ñ xyik'ett. <sup>19</sup> Jaa winaagin jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuu'tigøydi <sup>20</sup> sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayikwindsøy.

## 2

*Ku Pablo ttukmadøøy ja Timoteo sudso tkugajpxa'akt o pøngapøn jaa'y*

<sup>1</sup> Ixya meets jawyeen ndukmadøøy jøts ndanipøkti jøts møk xukunuu'kxyjawidit ja Dios jøts x'lamido'odit xpøktso'odit jøts tpudøkit ja naxwii'ñit jaa'y. <sup>2</sup> Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxindit ku amumjoojt nwindso'jka'ant nwinja'wa'ant. <sup>3</sup> Ku jade'en nbadu'unint jade'ents t'øyjawi ttsujawi ja Dios midi xyiknitso'ok'ajtimp, <sup>4</sup> Jabi jade'enxi ja ttsøky jøts niduki'iyi nnitso'ok'ajtindit jøts nnija'wa'andit ja tyii'byi ja yjanchpi. <sup>5</sup> Tu'ugyi jaa ja Dios Teety, jøts nayi tu'ugyi ja' midi xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy. <sup>6</sup> Ojts ja nwindson'ajtim

Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yiknijawinim ku ja xøøw ja jumøjt tø tpaatynim sa ja yjajty kyubejty. <sup>7</sup> Ja'agøjxp øts tø nyikpikta'aky kugajpxy'ajtpi ku'aaw'ajtpi jøts øts ja janchja'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'øñ nwa'añ, ka' nugo ndabyaaty, pø ja Cristoxi øts amuum njanchja'wip.

<sup>8</sup> Paty ø nwa'añ, jøts o ma pøn tja'myatstit ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win. <sup>9</sup> Jøts ja tøøxyøjk, tuda'aky'ajtin øyjaa'y'ajtin yiktundi. Ka'ap ja ja'abi wet tpikta'aktit midi namyikaxi kaxø'kp midi ja myigu'uk nugo tyukta'amutskidip. Kidi namyikajxingøjxp ja wyaay tyik'øyiði tyikpaadidi. <sup>10</sup> Jade'en ne'egi tpudøkidit ja myigu'uktøjk ku ja øy'ajtin tyiktu'undit sam ja'adi pøn ja Dios tø ñadyamiyøxyidi. <sup>11</sup> Ku ja Dios yja' yikajpxwa'kxy, amøñi ja tøøxyøjk tpatmado'odit, tuki'iyi ja yujy'ajtin tpikta'aktit. <sup>12</sup> Ka'ap mibaat ja tøøxyøjk tkajpxwa'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit. <sup>13</sup> Jabi jawyeenxi ja Dios tyikaxi'jky ja Adán jøtsnim ja Eva. <sup>14</sup> Jøts ja Adán ka'ap ja yikwin'ii'ñ. Ja tøøxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty. <sup>15</sup> Jade'en'ampy ja tøøxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtin, jøts møøt ñadyabudøkiyidit ja ja'gyukin.

## 3

*Sa yjaa'y'attit pøn ana'amp tsaptøjkjotp*

<sup>1</sup> Janch tiy'ajtin yø': janch øy yø'øbi tunk pøn tniwindsøn'ajtwamp ja Dios yja'. <sup>2</sup> Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'øgit twinjawit pøn nimejnip nija'jtíp jam tyøjkjotp; jøts øy tsuj nayide'en yik'ixpøkt; <sup>3</sup> ka'ap y'øyi jøts y'amu'u'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meeñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meeñ nugo pøkpaat tjawit. <sup>4</sup> Øy tsuj y'u'nkteety'att sam pyaat'atyí jøts tuki'iyí t'ext yjønjotp, jøts ja y'u'nk øy tsuj wyindsø'øgiyit; <sup>5</sup> ku jade'en pøn tkatu'unt yjønjotp tyøjkjotp sam u'nkteety'ajtin, ¿sudsots ja t'ana'amt pøn ja Dios tjanchja'widip? <sup>6</sup> Ka' pyaat'atyí ana'ambi tyøkit pøn tjemyabøjkíp ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyí ja ayo'on. <sup>7</sup> Nayide'en chøkyí jøts ttunjøpit ja øy'ajtin ja tuda'aky'ajtin jøts jade'en wyindsø'øgiyit pøn ja Dios yja' tkabaduujnipnim, jøts ka'ap ja jade'en pøky tyaja'adiyit jøts nayide'en ka'ap ja miku' nugo wyin'øøniyit.

*Sa yjaa'y'attit ja møjaa'dyøjk pøn tundíp tsaptøjkjotp pøn tpudøjkíp ja ayoobi jaa'y*

<sup>8</sup> Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyjaa'y'att jøts kø'øm ñawyindsø'øgiyit. Ka' ti ttu'undit, ka' ti

tkajpxtit. Ka' myuktigø'ødyit jawyeen ja'adi, jøts ka'ap ja meen nugo pøkpaat tjawidit. <sup>9</sup> Øy tsøky wa'ats tnijawidit sa ja Dios yikjanchjawī midī y'ijty kayiknija'wip, jøts ja wyinmaa'ñ øy tsuj wa'ats tmøøt'attit. <sup>10</sup> Ja' tsojkip jøts yik'ext yiknijawit pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk. <sup>11</sup> Nayide'en ja ñidø'øxy tyuda'aky'ajtmidit y'øyjaa'y'ajtmidit. Ka' nugo yjemgajpxtit pyagajpxtit. Ja' tyu'undip midī tiy'ajtin. <sup>12</sup> Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'una'jk jam yjøn jotp tyøjkjotp. <sup>13</sup> Ja møjaa'dyøjk pøn øy tsuj tundip sa ja tø yiktanipøkti, jinaxy ja myøjtøkidi jinaxy ja yikwindsø'øgidi jøts ja nayide'en ka' tsep t'ukja'wiñidi tnigajpxtit sudso yikjanchjawī ja nwindson'ajtim Jesucristo.

*Sa Dios ja wyinmaa'ñ tnanky'ijxyiyi midī y'ijty kayiknija'wipnim*

<sup>14</sup> Tsojk ø nnøjkxt jøts me n'ats'ext; ixyamts mets ya'at nøky ndanijayi. <sup>15</sup> Ku øts jotmøñ nda'anigyøjt, jøts xnijawit sa njaa'y'ajtindit møøt ja nmigu'uk pøn tø tjanchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tnigubojskip ja tyiibyī ja yjanchpi. <sup>16</sup> Janch tiy'ajtin yø', ku janch møj ja Dios wyinmaa'ñ midī y'ijty kayiknija'wip. Ixyamts yik'ixy yiknijawī jabi jade'enxi jap jaabyety y'ity ku:

Jaa'yin ja nwindson'ajtim Jesús ñanky'eixiyi ya  
 naxwiñ;  
 jøts ja Espiritu Santo tnigajpxy ku ja' tiy'ajtin  
 tmøøt'aty  
 jøts nayide'en ja ankilistøjk y'ejxøø ñija'wiyøø.

Tø yikajpxwa'kxy ja Jesús y'ixpøjkin o magajp, jøts jade'en tpadundi ja naxwii'ñit jaa'y jøts ja chajpajtnaa ma ja Dios Teety jap. Jade'en ja nøky wya'añ.

## 4

### *Sa winaagin tmajtstu'uttit ja Dios'ajot'ajtk*

<sup>1</sup> Tiy'ajtin ja Espíritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ jøts kyøxt ja naxwii'ñit. Jøts ja tpadu'undit ja ixpøjkin midi ka' tyiyi yjanchi, midi ja miku' yja'ajtpy. <sup>2</sup> Ja'abi jaa'y ja tmado'odip pøn taay'ajttip pøn ja pyøky tkaja'widip øy ja tjanijawidi ku møj tø tyundigøydi. <sup>3</sup> Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja kø'øm tø tjabikta'aky; pø tøxi ja Dios ja ttanibiktaagi jøts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiiby yjançpi yjøø'kxtipts ja', wan Dios ja ttamøjawidi ttagunuu'kxyjawidi. <sup>4</sup> Midi ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyiktunkpaajttint, <sup>5</sup> ku ja jade'en ndu'unint kunuu'kxyts ja wyimbejtnei ja pikta'aky sam ja kyajpxy wya'añ.

### *Sa ja Jesucristo øy tsuj yikmiduñ*

<sup>6</sup> Ku ya'at øy xuk'ixpøkt ja migu'uktøjk, øy idø'on ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midi ixyambaat mgamajstutpy. <sup>7</sup> Ka' xmøjpikta'akt ja kajpxy ja ayuujk midi ka' tyuñ. Amumjoojt ja Dios yja' xpaduujnit; <sup>8</sup> øy nugo



njanay'ejx'ejtint jøts møk møjaaaw nyiknajxint, ja Dios yja' ne'egi møj ku nbaduujna'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajtint xemikøjxp. <sup>9</sup> Janch yø' tiy yø', paat'ajtip jøts yø niduki'iyi nbadu'unint. <sup>10</sup> Ja'agøjxp møk ndu'unint øy njagu'ayo'ombaajtindi øy njayikjemdu'uñindi nyiktedu'uñindi. Ka' ti ngumaa'yindit, jabi tøxi ja Dios xmø'øyindi ja jøp'ejxin jøts niduki'iyi tyiknitso'okt pøn jaty pabøjkiyip.

<sup>11</sup> Yø'øbi winmaa'ñ idø'øn mni'ana'amp jøts nayide'en xnanky'ixpøkit. <sup>12</sup> Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win. <sup>13</sup> Ku øts jam udyaa'gyi nja'att, kajpx ja nøky jam mā mnamyukyidi sã ja Dios kyajpxy wya'añ. Yikxon xukwinjawit ja migu'uktøjk jøts ja yjotmøkta'aktit, yikxon waani xyik'ixpøkt. <sup>14</sup> Yiktuñ ja møk'ajtin ja wijy'ajtin midi ja Dios tø mmø'øyi, Dios waan ku ja møjaa'dyøjk ojts mgønixajyi.

<sup>15</sup> Tu'ugyi xu'unt yø'øbi winmaa'ñ jøts jade'en t'ejxtit tnijawidit sã tø xyikmiweni xyikaja'aji ja mja'gyukin jøts ja mjanchja'win. <sup>16</sup> Øyim mnay'ejx'ettit kø'øm midi mwinmaa'ñ'ajtpy, midi mduk'ixpijkpy, midi mduknija'wip ja migu'uktøjk, tu'ugyi xyik'ett midi mdumpy. Ku jade'en xu'unt mbaatpts ja øy'ajtin jade'en, nayide'en ja'adi pøn tmadoodip ja ixpøjkin.

## 5

*Sa ja Timoteo møøt y'ett pøn ja Dios tjanchja'widip*

<sup>1</sup> Ka' xwindso'ot, ka'ap o sa xnøjmit ja møjaa'dyøjk; ne'egi tuda'aky xkajpxwejt sam ja mdeedyin; nayide'en ja una'jktøjk øy tsuj xjawit sam ja mgø'ømigu'ugin. <sup>2</sup> Nayide'en ja møjaa'dyø'øxy xwinjawit xwindsø'øgit sam ja mdaagin, jøts nayide'en ja kiixyuna'jkti sam ja mgø'øm'uchin, jade'en ja mduda'aky'ajtin xyiktu'unt.

<sup>3</sup> Pudøki ja ku'øktyø'øxy pøn ti kadyimy'ejtchip. <sup>4</sup> Pøni jamts ja ku'øktyø'øxy møøt y'u'nk y'una'jk møøt y'ap y'ok, jade'en ja una'jk pyaat'atyidi jøts ja tpudøkidit ja tyeety tyaakjøts ja tyikwimbejtniyidit ku ja tø y'ijxyidi, yø' Dios y'øyja'wip, jade'en Dios ttsøky. <sup>5</sup> Ja ku'øktyø'øxy pøn nadyu'uk tø tyañ, pøn nipøn ka'ejtp, ejtpts ja Dios ja t'ajot'aty jøts ja pyudøkiyit, ka'ap ja Dios ja tjā'dyigøy jøpy ux. <sup>6</sup> Jamts nayide'en ja ku'øktyø'øxy pøn ja Dios tka'ajot'ajtp. Tyumpy ja' pøni ti ja tyunwampy, øøky ja ñabyiktaajkniyi. <sup>7</sup> Tukmadow yikxon, wan tnijawi jøts ka' pøn øy sa ñøø'mxiyit. <sup>8</sup> Jamts winaagin tkajotmay'aty ja myigu'uktøjk, abiky tpikta'aky ja yjøøn ja tyøjk jøts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pøn ja janchja'win tkajagyajptinim.

<sup>9</sup> Yø ku'øktyø'øxy yiklisti'atp midi tugi'pxy jumøjt pøni tøts ja tu'ugyi ñiyaa'y tø t'atsmøøt'aty, paat'ajtiyip ja mibaat yikpudøkit. <sup>10</sup> Mibaat ja yikpudøkit ja'agøjxp ku tø y'øyjaa'y'aty, pøni tø y'u'nk y'una'jk yikxon tyikyeeky tyiktsø'øky, pøni

tø øy tsuj t'adsøy ja jaa'y pøn tøjka'yø'ødyip, pøni tø yikxon twinjawī twindsø'øgi ja myigu'uk pøn tø tkupøjknidi ja Dios, pøni tø tpudøki pøn amjajtīp tsaachjajtīp, uk pøni tø ttuñ jadu'uk øy ti may'ajt øy ti pudøjkin.

11 Ka' mibaat yikjaabyatt ja ku'økyø'øxy pøn una'jknim; ja'agøjxp ku jotmøñ y'amajtskit, jade'en'ampyts ja Cristo yja' ka'pxy tka'ukpadu'uniyit, 12 jøts yikpøky'ixy ku tø tmajtstutni ja' midi tø t'ukpadøki. 13 Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midi jagapaat'ajtiyip. 14 Paty y'øyi jøts y'amajtskit pøn ku'økyø'øxy una'jknim, jøts ja y'u'nk t'ext tjagyapt sam pyaat'atyī jønjøtpy tøjkjøtpy n'ejxint njagyajpint, jøts ka' nugo ja jaa'y pyagajpxiyit. 15 Jamts winaagin pøn ja Dios yja' tø tmajtstuuji, ja miku' yja' tø tpanøjkxiyi. 16 Pøni pøn ja Dios yja' tø tkupøjkidi jøts pøni jam ja myigu'uk ku'økyø'øxy, mibaat ja kø'øm tpudøkidit pøni ti ja ka'ejtixip, jøts ja ka' pyudøkiyidit ja møjaa'dyøjk midi tundip jap tsaptøjkjøtpy. Jade'en'ampyts nayide'en yikpudøkit ja ku'økyø'øxy pøn ja myigu'uktøjk kadyimy'ejtīp.

17 Ja møjaa'dyøjk midi tnigutujk'ajttip ja janchja'wibidi jøts nwindso'jka'ant nwinja'wa'ant. Jamts ja' midi xuk'ejximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant. 18 Jabi jade'enxi jap jaabyety y'ity: “Kidi ja mdsakaa ajeñ xyik'okti ku ja xyiktunwa'andit.” Jøts nayide'en: “Ku jaa'y nyiktu'unint kuwani myijuu'ñ ja ttsøky.”

Jade'en ja nøky wya'añ midi ɪxa tɔ xnɪjawidi.

<sup>19</sup> Ka' xmɔjpkta'akt ku yikni'θɔnit ja mɔjaa'dyɔjk pɔni ka'ap ja a'ejxnaxpi te majtskin uk tigθɔgin.

<sup>20</sup> Pɔni tundigɔy'adɔtstip ja mɔjaa'dyɔjk, mibaats ja jam yiktamigajpxt ma ñamyukyidi ja janchja'wibidi jɔts jade'en tjɔptsɔ'ɔgidit tjɔpjawidit ku tyundigɔydi. <sup>21</sup> Ku ya'at jade'en ndanipiky wa'ats Dios Teety tmadɔy, wa'ats ja nwindson'ajtim Jesucristo tmadɔy mθɔt ja ankilistɔjkti, jɔts ɔy yikxon id'ɔn xpadu'unt yɔ ana'amin, ka' pɔn nugo xukta'oo'kpatt. Pɔni pɔn tundigθɔdyip tuknax ja xpayθ'ɔty. <sup>22</sup> Ka' nugo ajawi xpikta'aktit ja mɔjaa'dyɔjk midi tɪgutujk'atp ja janchja'wibidi, jawyeen yik'ext yiknijawit pɔni sa yjaa'y'aty, kuts kya'ɔyjaa'y'aty jɔts ja pyɔky ttapaatt ja janchja'wibidi, ɔyim mnay'ejx'etit jɔts ja pɔky mgapaadit.

<sup>23</sup> Kidi nugo tsuxknθɔ xumi'uuky, pɔ pɔjk'ejtpxi xijy mjoojt, vino m'uukp waani.

<sup>24</sup> Pɔn tundigθɔdyip midi yiknija'wip wa'ats, ja'ats yikpayθ'ɔpy, midi'its kayiknija'wip jaanimts ja yiknijawit ku ja payθ'ɔyin xθɔw y'ett. <sup>25</sup> Nayide'en ku ja ɔybi ndu'unint; ɔy ja jaty yjagayiknijawi, kuwani yiknijawi udyaa'agyi. Ka'ap ja jadi'iñi tyañ.

## 6

<sup>1</sup> Yɔ tumbitɔjk ɔy tuda'aky yjaa'y'attit jɔts twindsɔ'ɔgidit yikxon ja wyindsɔndi, jɔts ka' nugo ja Dios yikpagajpxt, jɔts nayide'en ka' nugo nyiktabagajpxint ja n'ixpɔjkin. <sup>2</sup> Nayide'ents ja tumbitɔjk pɔni jam ja wyindsɔn midi nayide'en tpadump ja Dios yja', ne'egi mɔjts ja twindsɔ'ɔgidit,

pø pyadumpxi nayide'en. Jade'ents ja ne'egi tpuðokidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amín midí nnigajpxpy.

*Sa ja Dios yja' nbaduujna'ant jøts agujk jotkujk n'ejtint*

<sup>3</sup> Pøni jam pøn tkajpxwa'kxy ja wenk ixpøjkin midí ka' tminabyaadyi ja nwindson'ajtim Jesucristo yja', midí tkawindsø'jkíp ja Dios, <sup>4</sup> nugo ja ñamyikexyi, ka'ap ja tnijawi pøni ti kyajpxpy. Nugo tyikjøøpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwyá'añidi. <sup>5</sup> Nugo ja y'awa'an'ajtk tyiktunidi ku tka'uknija'wiñidi ja tyiibi. Nugo win'øø'ningøjxp nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminamyayi. <sup>6</sup> Jade'en'ampy adøm ja jotkujk'ajtin nmøøt'ajtyim ku ja Dios yja' nbaduujña'am øy meeñ o ti ngamøøt'ajtyim. <sup>7</sup> Ka' ti pøn tmimiñ ku ngaxi'jkyimp ya naxwiñ, nayide'ents ku nwindigøø'ña'ant, ka'ats ti n'uk'ejna'ant; <sup>8</sup> pøni nbaajtyimp ja ngaajyik ja n'uujkik jøts ja nwet ja nnaamy, ndajotkujk'ajtimpts idøøn ja'. <sup>9</sup> Jamts pøn ja kumeeñ'ajtin ttsojkp. Tyumpy, o ti ttu'unt, jøts ja jade'en o sa nugo tpaatt ja meeñ, køømts ja jade'en ñanktyuu'tigøyidi, ka' tja'gyukidi pøni ti tyundip. Køøm ayo'on ja jade'en ñanktyukpaadyidi, jade'ents ja nugo ñankwyindigøyidi. <sup>10</sup> Ne'egi nugo xyiktundigøø'yint xyikajpxigøø'yint

ku ja kumeeñ'ajtín ndsojkiñt; jamts pøn winaagin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadiyt.

*Sa ja Timoteo yikxon tñigubajk'att ja janchja'win*

<sup>11</sup> Mets Timoteo, kidi me nayide'en m'adøtsmi, pø Diosxi mets ja yja' mbaduujniip. Yikyø'øy mets ja mdsinaa'yin øy tsuj, ja m'ajot'ajtín jøts ja mjanchja'win. Jøts xminamyayit øy pøn ja mmigu'uktøjk, jøts ja tuda'aky'ajtín yujy'ajtín xyiktu'unt. <sup>12</sup> Nitani møk yø janchja'win; kidi xmajtstu'uty midi ja Dios tø mdamidsokyiyi midi xemikøjxp ejtp, jabi øy tsujxi tø xukmadøy ja mayjaa'y sa ja janchja'win xjagyepy. <sup>13</sup> Ja Dios Teety midi xyikjujky'ajtíndip, ñija'wipst ja', sam ixyam n'ane'emy, nayide'ents ja nwindson'ajtim Jesucristo ttukmadøoy ja tiy'ajtín ja Poncio Pilato. <sup>14</sup> Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxiyt. Jade'en xu'unt kunim ja nwindson'ajtim Jesucristo mye'ent. <sup>15</sup> Ku tpaatt ja xøow ja jumøjt, jøts ja Dios Teety ja tkaxt ja nwindson'ajtim ya naxwiiñ. Tu'ugyi Dios Teety myøji midi ja øy'ajtín ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en. <sup>16</sup> Yø' tu'uk møj, ka' y'øøky, xemikøjxp ja y'ity. Jaj agujkpy chøøni mā ka' pøn miabaat pyaadyi y'ijxyi. ¡Yikwindsø'jkíp yikwinja'wip ku ja myøk'ajtín tmøøt'aty xemikøjxp! Jade'en idø'øn ja y'ejxi.

17 Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin. 18 Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip. 19 Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

*Midi ja Timoteo jaakyiktanipøjkp*

20 Mets Timoteo, møjpihta'ak midi tø myiktanipiky. Kidi xmøjpihta'aky ja ka'øy ayuujk midi ja Dios yja' tkaminabyaajtíp, midi ñadyijyi yiktejp ku ja tyiy'ajtin. 21 Tø winaagin tyuu'tigøydi pøn yø jade'embí winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'øn jade'en.

**Ja øgyajpxy ja ømyadya'aky midi xukpaajtimp  
ja nitso'ok'ajtin  
New Testament in Mixe, Tlahuitoltepec  
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixe, Tlahuitoltepec

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

422dcf73-46a5-5403-b423-8406ed76ac1d